

■ PARTIDA LIBERALA DAL GRISCHUN

Il pievel vul in segund tunnel dal Gottard

(cp) Quests dis èsi vegni enconuscent ch'ina majoriad da la populaziun svizra beneventass la construcziun d'in segund tunnel dal Gottard. Tenor in'enquista represchentativa fatga da l'institut demoscopic Opinionplus per incumbensa dal «SonntagsBlick» èn 70,8 pertschient da las persunas dumandadas s'exprimidas en favur da quel. Per il chantun Grischun e las vischnancas a l'A13 è quai in fatg legraivel. La PLD.Ils Liberals dal Grischun è da l'avis ch'i na dettia nagina autra soluziun che da construir in segund tunnel per dumagnar il problem durant la sanaziun dal tunnel existent, senza ch'il Grischun stuessia prender en cumpra restricziuns massivas. Il cussegl federal ha preschentà las disposiziuns legalas correspundentas, numnadamain ch'in segund tunnel na dastgia betg manar a dapli traffic, cunquai ch'ils vehichels pon

mintgamai charrar mo sin in vial. Quai portia la segirezza pretendida. La PLD.Ils Liberals dal Grischun s'engascha per persvader il pievel da quest project da votaziun. La PLD. Ils Liberals dal Grischun pretenda gia dapi il 2002 in segund tunnel dal Gottard. Ella è adina s'exprimida danovamain cura ch'i gieva per sviar il traffic massiv durant la sanaziun dal tunnel ils onns 2018–2020 via la ruta dal Son Bernardin. Cunter questa pretenziun èsi da far opposiziun. Cun raschun è era la regenza grischuna s'exprimida en ina posiziun al cussegl federal en favur d'in segund tunnel dal Gottard. Per il Grischun è in segund tunnel dal Gottard da gronda impurtanza perquai che la ruta dal Son Bernardin na dumogna simplamain betg dapli traffic. Ina colliaziun segira tras il massiv dal Gottard è perquai ina necessitad. Ultra da quai vai era per augmentar la segirezza dal traffic, ed en

quel regard è la soluziun proponida la megliora. In'infrastructura che funcziuna senza incaps è in factur central per la Svizra sco ferma piazza economica – ed uschia era per plazzas da lavur segiras. Il tunnel dal Gottard sco la pli impurtanta axa da traffic tranter nord e sid tutga senza dubi vitiers. Ord vista da la PLD.Ils Liberals dal Grischun fissan ils custs per ina soluziun provisorica memia auts. Da quasi separar il chantun Tessin per in temp pli lung dal rest da la Svizra fiss ultra da quai ina dira emprova per la coesiun da noss pajais. Cun manar pli tard il traffic sin in vial – sco garanti ussa cleramain – ed en dus tunnels senza engrondir la capacitad po vegnir augmentada la segirezza indispensabla senza sutminar la protecziun da las Alps conforma a la constituziun. Quai è vegnì confermà pliras giadas cun la decisiun dal cussegl federal e da l'assemblea federala.